





50!






法苑珠林
一一



Centimetres
TIFFEN Color Control Patches
© The Tiffen Company, 2007

Blue
Cyan
Green
Yellow
Red
Magenta
White
3/Color
Black





法苑珠林卷第三十七

唐上都西明寺沙門釋道世玄暉撰

神異篇第二十之餘

禱異部

如譬喻經云昔有大家收穀千斛埋著地中前至春
溫開窖取種了不見穀而有一蟲大如牛莖無有手
足亦無頭目如頑鈍肉主人大小莫不恠之出著平
地卽問汝是何等終無可道便以鐵錐刺一處蟲卽
語曰欲知我者持我著大道傍自當有名我者於是
舉著道邊三日之中無能名者次有數百人乘黃馬

車衣服侍從皆黃駐車而呼穀賊汝爲何在是問答曰吾食人穀故持我著此語極久便辭別去主人問穀賊向者是誰也答言是金寶之精居在此西三百餘步大樹下有百石甕滿中金主人即將數十人往掘卽得甕金家室歡喜輦載將歸叩頭向穀賊云今日得金是大神恩寧可留神共歸更設供養穀賊曰前食君穀不語姓字者欲令君得是金報今當轉行福於天下不得復住言竟忽然不現又譬喻經云王舍城東南隅有一汪水城內溝瀆汗穢屎尿盡趣其中臭不可近有一大蟲生汪水內身長數丈無有手

足而宛轉低仰戲汪水中觀者數千阿難分衛見而往觀蟲卽跳踉波浪動涌具以啓佛佛與諸比丘共詣池所衆人見佛各各念言今日如來當爲衆會說蟲本末以釋衆疑不當快乎佛言昔維衛佛泥洹後時有塔寺有五百比丘經過寺中寺主見大歡喜請留供養三月衆皆受請寺主盡心供饌無有所遺後五百商人入海採寶還過塔寺見五百比丘精勤行道並各發心當設薄供五百商人各捨一珠得五百摩尼珠以寄寺主囑寺主言曰足以吾珠供僧比丘言諾卽皆受之後生不善心圖欲獨取不爲供衆衆

僧問言前賈客施珠應當設供而發遣耶寺主言是
施我耳若欲奪吾糞可施汝若不時去剽汝手足投
於糞坑衆愍其癡默然各去故知惡祝不可不慎又
智度論云佛在世時有人遠行獨宿空舍夜中有鬼
擔一死人來著其前復有一鬼逐來瞋罵云死人我
物汝忽擔來先鬼言是我物我自持來後鬼言是死
人實我擔來二鬼各捉一足一手爭之前鬼言此間
有人可問後鬼卽問是死人誰擔來是人思惟此二
鬼力大若實不實俱不免死便語言前鬼擔來者是
後鬼大瞋捉其人手拔出著地前鬼愍之急取死人

一臂附之卽著如是兩臂兩脚頭脇舉身皆易於是
二鬼共食所易人身拭口而去其人思惟我父母生
身眼見二鬼食盡今我此身悉是他空我今定有身
耶爲無身耶行到佛塔問諸比丘廣說上事諸比丘
言從本已來恒自無我但以四大和合故計爲我身
如汝本身與本無異諸比丘度之爲道得阿羅漢果
又善信經云有神藥樹名曰摩羅陀祇主馱天下萬
毒不得妄行有大神虵身長一百二十尺虵行索食
有黑頭蟲身長丈五蟲行道中與虵相逢適欲舉頭
前嚙大蟲虵聞藥香屈頭欲走虵身羅藥樹身卽中

斷分作兩段頭半生得走尾便臭爛諸毒聞此蛇臭
衆惡毒氣皆悉消滅又智度論云明月摩尼珠多在
龍腦中有福衆生自然得之亦名如意珠常出一切
寶物衣服飲食隨意皆得得此珠者毒不能害人
能燒或是帝釋所執金剛與修羅鬪時碎落閻浮提
變成此珠又言過去久遠佛舍利法既滅盡變成此
珠以爲利益又華嚴經云大海中有四寶珠一切衆
寶皆從之生若無此四珠一切寶物漸就滅盡諸小
龍神不能得見唯娑伽羅龍王密置深寶藏中此深
寶藏有四種名一名衆寶積聚二名無盡寶藏三名

遠熾然四名一切莊嚴聚又大海之中有四熾然光
明大寶一名日藏光明大寶二名離潤光明大寶三
名火珠光明大寶四名究竟無餘光明大寶若大海
中無此四寶四天下金剛圍山乃至非想非非想處
皆悉漂沒日藏光明能變海水爲酪離潤光明能變
海酪爲酥火珠光明能然海酥究竟無餘光明能然
海酥永盡無餘頌曰

至聖冥運

罔慮罔識

神功掩暉

賢愚難測

善惡共居

昇沈同色

對事思悟

知之神匿

處染不涅

遺塵攸息

匪伊玄覽

敦扇其極

省已愚惰

高慕齊德

萬代揚名

千齡福力

感應緣

略引十八驗

晉沙門釋曇邃

晉沙門釋法相

晉沙門釋仕行

晉沙門釋耆域

晉沙門釋佛調

晉沙門釋捷陀

晉居士抵世常

宋參軍程德度

齊沙門釋弘明

齊沙門釋法獻

隋沙門釋普安

隋沙門釋法安

唐沙門釋慧侶

唐沙門釋轉明

唐沙門釋賈逸

唐沙門釋法順

唐兗州鄒縣人張忘字

諸傳禱明神異記

晉河陰白馬寺有釋曇邃未詳何許人少出家止河陰白馬寺蔬食布衣誦正法華經常一日一徧又精達經旨亦爲人解說常於夜中忽聞扣戶云欲請法師九旬說法邃不許固請乃赴之而猶是眠中比覺已身在白馬塢神祠中并一弟子自爾日日密往餘無知者後寺僧經祠前過見有兩高座邃在北弟子在南如有講說聲又聞有奇香之氣於是道俗共傳咸云神異至夏竟神施以白馬一疋白羊五頭絹九

十匹呪願畢於是各絕遂終不知所在

晉越城寺有釋法相姓梁不測何許人常山居精苦誦經十餘萬言鳥獸集其左右皆馴若家禽太山祠有大石函貯財寶相時山行宿于廟側忽見一人玄衣武冠令相開函言絕不見其石函蓋重過千鈞相試提之飄然而起於是取其財以救貧民至晉元興末卒春秋八十矣

右
上
驗
出
梁
高
僧
傳

晉沙門仕行者潁川人也姓朱氏氣志方遠識宇沈正修心直詣榮辱不能動焉時經典未備唯有小品而章句闕略義致弗顯魏甘露五年發迹雍州西至

撰述
法苑珠林卷三十一
于闐尋求經藏踰歷諸國西域僧徒多小乘學聞仕
行求方等諸經咸駭怪不與曰邊人不識正法將多
惑亂仕行曰經云千載將末法當東流若疑非佛說
請以至誠驗之乃焚柴灌油煙炎方盛仕行捧經涕
淚誓願誓曰若果出金口應宣布漢地諸佛菩薩宜
爲證明於是投經火中騰燎移景旣而一積煨燼文
字無毀皮牒若故舉國欣敬因留供養遣弟子法饒
齋送梵本還至陳留浚儀倉垣諸寺出之凡九十篇
二十萬言河南居士竺叔蘭練解方俗漢善法味親
共傳譯今放光首品是也仕行八十乃亾依闍維之

火滅經曰屍形猶全國人驚異皆曰若真得道法當
毀壞應聲碎散乃斂骨起塔慧志道人先師相傳釋
公亦具載其事也

晉沙門耆域者天竺人也自西域浮海而來將遊關
洛達舊襄陽欲寄載船北渡船人見梵沙門衣服弊
陋輕而不載比船達北岸耆域亦上舉船皆驚域前
行有兩虎迎之弭耳掉尾域手摩其頭虎便入艸於
是南北岸奔往請問域曰無所應答及去有數百人
追之見域徐行而衆走猶不及惠帝末域至洛陽洛
陽道士悉往禮焉域不爲起譯語譏其服章曰汝曹

分流佛法不以真誠但爲浮華求供養耳見洛陽宮
曰切利天宮髣髴似此當以道力成就而生死力爲
之不亦勤苦乎沙門支法淵坐法興並年少後至域
爲起立法淵作禮訖域以手摩其頭曰好菩薩羊中
來見法興入門域大欣笑往迎作禮捉法興手舉著
頭上曰好菩薩從天人中來尚方中有一人廢病數
年垂死域往視之謂曰何以墮落生此憂苦下病人
於地臥單席上以應器置腹上紵布覆之梵唄三偈
訖爲梵呪可數千語尋有臭氣滿屋病人曰活矣域
令人舉布見應器中如汗泥者病人遂瘥長沙太守

滕承文先頗精進時在洛陽兩脚風攣經年域爲呪
應時得申數日起行滿水寺中有思惟樹先枯死域
向之呪旬日樹還生茂時寺中有竺法行善談論時
以比樂令見域稽首曰已見得道證願當稟法域曰
守口攝意身莫犯如是行者度世去法行曰得道者
當授所未聞斯言八歲沙彌亦以之誦非所望於得
道者域笑曰如子之言八歲而致誦百歲不能行人
皆知敬得道者不知行之卽自得以我觀之易耳妙
當在君豈慍未聞京師貴賤贈遺衣物以數千億萬
悉受之臨去封而畱之唯作幡八百枚以駱駝負之

先遣隨估客西歸天竺又持法興一納袈裟隨身謂法興曰此地方大爲造新之罪可哀如何域發送者數千人於洛陽寺中中食訖取道人有其日發長安來見域在長安寺中又域所遣估客及駱駝奴達燉煌河上逢估客弟於天竺來云近燉煌寺中見域弟子潔登者云於流沙北逢域言語欸曲計其旬日又域發洛陽時也而其所行蓋已萬里矣

晉沙門佛調不知何國人往來常山積年業尚純朴不表辭飭時咸以此重之常山有奉法者兄弟二人居去寺百里兄婦病甚篤載出寺側以近醫藥兄既

奉調爲師朝晝常在寺中諮詢行道異日調忽往其家弟具問嫂所苦并審兄安否調曰病者麤可卿兄如常調去後弟亦策馬繼往言及調旦來兄驚曰和尚旦初不出寺汝何容相見兄弟爭問調調笑而不答咸共異焉調或獨入溪山一年半歲齋乾飯數升還恒有餘有人嘗隨調山行數十里天暮大雪調入石穴虎窟中宿虎還橫臥窟前調語曰我奪汝居處有愧如何虎弭耳下山隨者駭懼調自剋亡期遠近悉至乃與訣曰天地長久尚有崩壞豈況人物而欲永存若能盪除三垢專心真淨形數雖乖而神會必

同衆咸涕流調還房端坐以衣蒙頭奄然而終終後數年調白衣弟子八人入西山伐木忽見調在高巖上衣服鮮明姿儀暢悅皆驚喜作禮問和尚尚在此耶答曰吾常自在耳其問知故消息良久乃去八人便捨事還家向同法者說衆無以驗之共發塚開棺不見其屍

晉捷隨勒不知何國人也嘗遊洛邑周歷數年雖敬其風操而莫能測焉後語人曰盤鴉山中有古塔寺若能修建其福無量衆人許之與俱入山既至唯艸木溪蕪莫知基朕勒指示曰此是寺基也衆試掘之

果得塔下石礎復示講堂僧房井竈開鑿尋求皆如其言於是始疑其異寺既修勒爲僧主去洛百里每朝至洛邑赴會聽講竟輒乞油一鉢擊之還寺雖復去來早晚未曾失中晡之期有人曰能行數百里者欲隨而驗之乃與俱此人馳而不及勒顧笑曰汝執吾袈裟可以不倦既持衣後不及移晷便已至寺其人休息數日乃還方悟神人後不知終

晉抵世常中山人也家道殷富太康中禁晉人作沙門世常奉法精進潛於宅中起立精舍供養沙門于法蘭亦在焉僧衆來者無所辭却有一比丘姿形頑

陋衣服塵弊跋涉塗澤來造世常常出為作禮命奴
 取水為其洗足比丘曰世常應自洗我足常曰年老
 疲瘵以奴自代比丘不聽世常竊罵而去比丘便見
 神足變身八尺顏容瓌偉飛行而去世常撫膺悔歎
 自撲泥中時抵家僧尼及行路者五六十人俱得望
 視見在空中數十丈上了了分明奇芬異氣經月不
 歇法蘭即名理法師見宗者也有記在後卷傳蘭以
 語於弟子法階階每說之道俗多聞

宋程德度武昌人父道惠廣州刺史廣為衛軍臨川
 王行參軍時在尋陽屋有鷄巢夜見屋裏忽然自明

有一小兒從窠而出長可尺餘潔淨分明至度牀前
 曰君却後二年當得長生之道儻然而滅得度甚祕
 異之元嘉十七年隨王鎮廣陵遇禪師釋道恭因就
 學禪甚有解分到十九年春其家武昌空齋忽有殊
 香芬馥達于衢路闔境往觀三日乃歇右六驗出
 冥祥記
 齊永興栢林寺有釋弘明本姓羸會替山陰人少出
 家貞苦有戒節止山陰雲門寺誦法華習禪定精勤
 禮懺六時不輟每旦則水瓶自滿實感諸天童子以
 為給使也明嘗於雲門坐禪虎來入明室內伏于牀
 前見明端然不動久久乃去又時見一小兒來聽明

誦經明曰汝是何人答曰昔是此寺沙彌盜帳下食
今墮園中聞上人道業故來聽經願助方便使免斯
累也明卽說法勸化領解方隱後於永興石姥巖入
定又有山精來惱明明捉得以腰繩繫之鬼遜謝求
脫云不敢復來乃解放於是絕迹以齊永明四年卒
于栢林寺春秋八十有四

齊南海荆山有釋法獻是廣州人始居此寺歲久彫
衰獻率化有緣更加治葺改曰延祥後入藏薇山創
寺寺成後有兩童子携手來歌云藏薇有道德歡樂
方未央言終忽然不見舉寺驚嗟咸歎神異獻後入

禪忽見一人來云磬繩斷何不早治獻驚起往視垂
將委地申其手接得無所損後不知所終

隋終南山梗梓谷釋普安姓郭氏雍州北涇陽人也
儀軌行法獨處林野不宿人世專崇禪思至于沒齒
栖遲荒險不避狼虎常讀華嚴手不釋卷遵修苦行
以身爲物常遊山野用施禽獸虎豹雖來臭而不食
常懷耿耿不副情願值周廢教恒共碩德三十餘僧
避地終南安置幽谷自身行乞資給豐足雖被聞徹
皆獲免難時有謫法師避難在義谷杜映世家掘窔
藏之安被放還因過禮覲謁曰安公明解佛法頗未

寬多而神志絕倫不避強禦蓋難及也安曰今蒙脫
難乃惟華嚴經力也至隋文帝創曆佛教大興廣募
遣僧依舊安置時棟梓一谷三十餘僧應詔出家並
住官寺唯安一人習樂山居守素林壑時行村聚惠
益生靈終寢煙霞不接浮俗末有人於子午虎林兩
谷合澗之側鑿龕結庵延而住之初住龕日上有大
石正當其上恐落樞出逐峻崩下安自念曰願移餘
處莫碎龕窟石遂依言進避餘所大衆共怪安曰是
華嚴經力也未足異之又於龕東石壁澗左有索陀
者川鄉巨害縱橫非一陰疾安德恒思誅殄與伴三

人持弓挾刃攘臂挽強將欲放箭箭不離弦手張不
息怒眼舌噤立住經宿聲相通振遠近雲會鄉人替
首歸誠請救安曰素了不知豈非華嚴力也若欲除
免但令懺悔如語教之方蒙解脫又龕西魏村張暉
者夙興惡念以盜爲業夜往安所私取佛油窺受五
斗背負而出旣至院門迷昏失性若有所縛不能得
動眷屬鄉村同來爲謝安曰余不知也蓋華嚴力也
語令懺悔扶取油窺如語得脫又龕南張卿者來盜
安錢袖中持去旣達家內寫而不出口噤無言卽尋
歸懺服過而去又有程郭村程暉和者頗懷信向恒

來安所聽受法要因患身死已經兩宿纏屍於地伺欲棺斂安時先往鄆縣返還在道行達西南之德行寺東去暉村五里遙喚程暉和何爲不見迎耶連聲不已田人告曰和久死矣無由迎矣安曰斯乃浪語吾不信也尋其至村厲聲大喚和遂動身傍親乃割所纏繩令斷安入其庭又大喚之和卽忽起匍匐就安安令屏除棺器覆一宮笈以當佛坐令和遶旋尋服如故更壽二十年後遇重病來投乞救安曰放爾遊蕩非吾知也便遂命終時安風聲搖逸道俗崇向其側衆也皆來請謁興建福會多有通感故於昆明

池東北白村有老母病臥失音百有餘日指爲男女思見安形會其母意請來至宅病母旣見不覺下迎言問起居奄同常日遂失病苦于時聲名更振村聚齊集欲設大齋大萬村中有田遺生者家途壁立而有四女妻著弊布至膝而已四女赤露迥無覆身大女名華嚴年已二十唯有麤布二尺擬充布施安引村衆次至其門愍斯貧苦遂度不入大女思念由我貧煎不及福會今又不修當來何救周徧求物聞無一物仰面悲號遂見屋甍一把亂糜用塞明孔挽取抖藪得穀十粒揉以成米并將前布擬用隨喜身旣

無衣待至夜暗匍匐而行趨齋供所以前施物遙擲
衆中十餘粒米別奉炊飯因發願曰女人窮困由昔
種慳業今得窮報困苦如是今竭貧行施用希來報
作此願已以此十粒黃米投飯甑中必若至誠貧業
盡者當願所炊之飯變成黃色如無所感命也奈何
作此誓已掩淚而返於是甑中五石米飯並成黃色
大衆驚嗟未知所以周尋緣構乃云是因田遺生女
之願力也齋會齊率獲粟十斛尋濟之女辦法衣仍
度華嚴送入京寺爾後聲名重振弘悟難述安居處
雖隱每行慈救年常二社血祀者多周行救贖勸修

法義不殺生邑其數不少嘗於龕側村社縛猪三頭
將加烹宰安聞往贖社人恐不得殺增價索錢十千
安曰貧道見有三千已加本價十倍可以相與衆各
不同更相忿競忽有小兒羊皮裹腹來至社會助安
贖猪既見諍競因從乞酒行飲行舞焜煌旋轉合社
老少眼並失明須臾自隱不知所在安卽引刀自割
胠肉曰此彼俱肉耳猪食糞穢爾尚噉之況人食米
理至貴也社人聞見一時同放猪既得脫遶安三市
以鼻啄觸若有愛敬故使効之南西五十里內雞猪
絕嗣乃至于今其感發慈善皆此類也性多誠信樂

讀華嚴一鉢三衣累紀彌勵開皇八年頻勅入京爲
皇儲門師長公主營建靜法復延住寺名雖帝宇常
寢巖阿以大業五年十一月五日終于靜法禪院春
秋八十矣

隋東都寶揚道場釋法安姓彭安定鶉孤人少出家
在太白山九龍精舍慕禪爲業麤食弊衣卒于終老
到開皇中來至江都令通晉王門人以其形質矬陋
言笑輕舉並不爲通日別門首諭遣不去試爲通之
王聞召入相見如舊更住慧日王所遊履必齋隨從
及駕幸泰山時遇渴乏四顧惟巖無由致水安以刀

刺石引水崩注用給帝王時大嗟之問何力致爾答
王力使爾及從王入磧達于泥海中應遭變怪皆預
避之得無損敗後往泰山神通寺僧來請檀越安爲
達之王乃手書寺壁爲弘護也初與王入谷安見一
僧著弊衣乘白驢而來王問何人安曰斯朗公也卽
創造神通故來迎引及至寺中又見一神狀甚偉大
在講堂上手馮鷄吻下觀人衆王又問之答曰此太
白山神從王者也爾後諸奇不可廣錄至大業之始
帝彌重之威轍王公見皆屈膝常侍三衛奉之若神
又往名山召諸隱逸郭智辯釋志公澄公杯度一時

總萃慧日道場有道藝者二千餘人四事供給資安
爲首又於東都爲立寶楊道場唯安一衆居中樹業
至十一年春四方多難無疾而終春秋九十有八初
將終前告帝曰安亡後百日火起出於宮內彌須慎
之及至寒食油沸上焚夜中門閉三院宮人一時火
死帝時不以爲怪送柩太白資俸官給然安德潛於
內外同諸侶眠不施枕頸無委曲延頸牀前口出流
涎每有升餘將呈所表各獲靈徵

隋蔣州大歸善寺釋慧侶姓陽晉陵曲阿人也靈通
幽顯世莫識之而翹敬尊像事同真佛每見立像不

敢輒坐勸人造像唯作坐者道行遇厄沒命救之後
往嶺南歸心真諦專釋禪法大有深悟末住栖霞安
志虛靜往還自任不拘出世時往揚都偈法師所偈
素知道行異禮接足將還山寺請見神力侶云許復
何難卽從窻中出臂長數十丈解齊熙寺佛殿上額
將還房中語侶云世人無遠識見多驚異故吾所不
爲耳以大業元年終于蔣州大歸善寺春秋八十有
二初侶終日以三衣襍遙擲堂中自云三衣還衆僧
吾今死去徒衆好住便還房內大衆驚起追之乃見
房中白骨一具跏坐牀上就而撼之鏘然不散

唐西京化度寺釋轉明俗姓鹿氏未詳何許人形服僧儀貌非弘偉容止淡然色無喜愠以隋大業八年無何而來居住洛邑告有賊起及至覆檢宗緒莫從帝時感之未能加罪權令收禁初不測其然至來年六月果逢梟感作逆驅逼凶醜棄斥東都誅戮極甚方委其言下勅放之而明雖被拘繫情計如常與諸言議曾無所及會帝往江都行達偃師時獄中死囚數有五十剋時斬決明日吾當放此死厄卽往獄所假爲餉遺面見諸囚告曰明日車駕當從此過爾等一時大呼云有賊至若問所由云吾所委當免死矣

及至期會便如所告勅乃總放諸囚然收明入禁便大笑而受都無憂懼于時四方艸竈人不聊生如明言矣大業末歲猶被拘繫越王踐祚方蒙釋放雖往還自在而恒居乾陽門內別院供擬恐其潛逸密遣三衛私防護之及皇唐恭建議軍國謀猷恒預惟握籌計利害僞鄭世充倍加信奉守衛嚴設又兼恒度至開明二年卽當唐武德二年也明從洛宮安然而出周圍五重初不見迹審僞都之將敗故西達京師太武皇帝夙奉音問深知神異特興禮敬勅住化度寺數引禁中具陳徵應及後事會咸同契合以其年

八月忽然不見衣資什物儼在房中尋下追徵徧國周訪了無所獲有所諮學者常以平等一法志而奉之然記諸道俗過未苦樂等報皆有靈驗行至總持顧僧衆曰此寺不久當有血流宜共慎之恰都師法該等私度世充兒孫尋被收錄戮之都市方悔前失追不可及

唐安州沙門賈逸不知何許人隋仁壽初遊于安陸言戲出沒有逾符讖形服改變遊涉不定或緇或素分身諸縣及至推驗方敬其德行迹不輕爲無識所恥有方等寺沙門慧高學行通博因行遇之以紙五

十張施云法師由此得解耳初不測其所因後有諍起高被引禁官司責問列辯而答紙盡事了如符本契徵應所合例皆如此末至一家云承卿有女欲爲婚媾此家初許因往市肆唱令告乞云某家與我婦須得禮贈廣索錢米剋日成婚數往彼門揚聲陳唱女家羞恥遂密殺之埋屍糞下經停三日行遊市上逢人說言被殺之事大業五年天下清晏逸與諸羣小戲水側或騎橋樁手把弄之云抑羊頭振羊頭衆人倚看笑其所作及至江都楊家禍亂咸契前言不知所終

唐雍州義善寺釋法順俗姓杜氏雍州萬年縣人稟性柔和志存儉約京室東阜地號馬頭空岸斥重邃堪爲靈窟有因聖寺僧珍禪師本是順受業師珍矧創伊基勸俗修理端坐指撝示其儀則忽感一犬不知何來白足身黃自然馴擾徑入窟內口銜土出須臾往返勞而不倦食則同僧過中不飲既有斯異四方響歸乃以聞上隋高重之日賜米三升因供常限乃至龕成無爲而死今所謂因聖寺是也順時躬親其事更倍歸依力助締構勸民設會供限五百臨時倍來供主懼少順曰莫遮通給千人供足猶有餘剩

常有張河江張弘暢家畜牛馬性本慙惡人皆患之賣無取者順語慈善如有聞從自後調善更無舂齒又每年夏中引衆驪山栖靜地多蟲蟻無因種菜順恐有損就地指示令蟲移徙不久往示恰無蟲矣又順患腫膿潰流逸有敬唎之或以帛拭尋卽除愈餘膿發香氣氛氲難比拭帛猶在香氣不歇又有三原縣人田薩埵者生來患聾兼有張蘇等亦患瘧順聞命來與共言議遂如好人永卽痊復又有武功縣僧爲毒龍所魅衆以投之順端拱對坐毒龍遂陰託病僧曰禪師旣來義無久住極相勞憐尋卽釋放但有

瘴癘魔邪所惱者歸順皆愈不施呪術福力如是其
不測者謂有陰德所感故使感靈偏敬致言所教多
抑浮詞顯直正理敦實爲懷見有樹神廟室多卽焚
除泥愛道俗貴賤皆投讚毀兩途開胃莫二似如不
知翻作餘語因行南野將度黃渠其水泥漲無人敢
度岸復峻滑雖登還墮水忽斷流如行陸地及順上
岸水尋還溢門徒目覩不測其然所感幽通事多非
一財帛靡恡通用無主但服麤弊卒無兼副朝野知
委聞徹皇帝引入內宮崇敬致禮合宮歸仰請受戒
法以貞觀十四年都無疾苦告累門徒生來行法令

後承用言訖如常跣趺坐卒終於南郊義善寺春秋
八十有四臨終忽有雙鳥投房悲哀驚切因卽坐送
于樊川之北原鑿穴處之京邑道俗同嗟制伏人馬
亘野悲號慟地肉色不變經月逾鮮安坐三周枯骸
不散自終至今恒有異香流注屍所往者同聞學侶
門徒恐有外侵乃藏龕內不懼外竊四衆良辰赴供

彌滿

右人驗出
唐高僧傳

唐兗州鄒縣人姓張忘字曾任縣尉貞觀十六年欲
詣京赴選途經太山因而謁廟祈福廟中府君及夫
人并諸子等皆現形像張時徧禮拜訖至於第四子

傍見其儀容秀美同行五人張獨呪曰但得四郎交遊詩賦舉措一生分畢何用仕宦及行數里忽有數十騎馬揮鞭而至從者云是四郎四郎曰向見兄垂殷故來仰謁因而言曰承兄欲選然今歲不合得官復恐前途將有災難不復須去也張不從之執別而去行經一百餘里張及同伴夜行被賊劫掠裝具並盡張遂呪曰四郎豈不相助有頃四郎車騎畢至驚嗟良久卽令左右追捕其賊顛仆迷惑却來本所四郎命人決杖數十其賊胼胝皆爛已而別去四郎指一大樹兄還之日於此相呼也是年張果不得官而

歸至本期處大呼四郎俄而卽至乃引張云相隨過宅卽有飛樓綺觀架迥陵虛維堞參差非常壯麗侍衛巖峻有同王者所居張旣入中無何四郎卽云須參府君始可安坐乃引張入經十餘重門趨走而進至大堂下謁拜而見府君非常偉絕張時戰懼不敢仰視判官判官事似用朱書字皆極大府君命侍宣曰汝乃能與我兒交遊漢爲善道宜停一二日譔聚隨便好去卽令引出一別館盛設珍羞海陸畢備絳竹奏樂歌吹盈耳卽與四郎同室而寢已經一宿張至明旦因而遊戲庭序徘徊往來遂窺一院正見

其妻於衆官人前著枷而立張還堂中意甚不悅四郎怪問其故張具言之四郎大驚云不知媿來此也卽自往造諸司法所其類乃有數十人見四郎來咸走下階並足而立以手招一司法近前具言此事司法報曰不敢違命然須白錄事知遂召錄事錄事許諾云仍須夾此案於衆案之中方便同判始可得耳司法乃斷云此婦女勘別案內嘗有寫經持齋功德不合卽死遂故令歸張與四郎涕泣而別立之仍囑張云唯作功德可以益壽張乘本馬其妻從四郎借馬與妻同歸妻雖精蒐事同平素行欲至家去舍可

百步許忽不見張大怖懼走至家中卽逢男女號哭又知已殞張卽呼兒女急往發之開棺見妻忽起卽坐蹶然笑曰爲憶男女忽怪先行於是已死經六七日而蘇也兗州士人說之云爾

右一驗出
冥報記

述征記曰桓仲爲江州刺史遣人周行廬山冀覩靈異旣陟崇巘有一湖而水生桑樹有羣白鵠湖中有敗船赤鱗魚使者渴極欲往飲水赤鱗魚張鬣向之使者不敢飲神異經曰北方荒外有湖方千里平滿無高下有魚長七八尺形狀如鱧而目赤晝在湖中夜化爲人刺之不入煮之不死以烏梅二七煮之卽熟

食之可以愈邪病臨海記曰郡東北二十五里任曾
 逸家有一石井自然天成非人工所造井深四丈常
 有涌泉大水不溢大旱不竭夏絕香冷冬至甜溫長
 老相傳云昔有採材人臨溪洗器流失酒杯後出於
 井中地鏡圖曰夫寶物在城郭丘墻之中樹木為之
 變視柯偏有折枯是其候也視折枯所向寶在其方
 凡有金寶常變作積蛇見此輩便脫隻履若履以擲
 之若溺之即得凡藏寶忘不知處以大銅槃盛水著
 所疑地行照之見人影者物在下也地鏡圖曰視屋
 上瓦獨無霜其下有寶藏晏子春秋曰和氏之璧井

里之朴耳良工修之則為存國之寶

孔鄉子云井里之厥又云任人

豚之為天下寶

述異記曰南康雩都縣沿江西出去縣三里名夢口
 有穴狀如石室舊傳常有神鷄色如好金出此穴中
 奮翼迴翔長鳴響徹見之輒飛入穴中因號此石為
 金鷄石昔有人耕此山側望見鷄出遊戲有一長人
 操彈彈之鷄遙見便飛入穴彈丸正著穴上九徑六
 尺許下垂蔽穴猶有間隙不復容人又有人乘船從
 下流還縣未至此崖數里有一人通身黃衣擔兩籠
 黃瓜求寄載之黃衣人乞食船主與之食訖船適至

崖下船主乞瓜此人與仍唾盤上徑上崖直入石
中船主初甚忿之見其人石始知神異取向食器視
之見盤上唾悉是黃金吳錄曰日南北景縣有火鼠
取毛爲布燒之而精名火浣布晉陽春秋曰有司奏
依舊調白總武帝不許搜神記曰崑崙之墟有炎火
之山山上有鳥獸草木皆生於炎火之中故有火浣
布非此山艸木之皮則獸之毛也魏文帝以爲火性
酷烈無含養之氣著之典論刊廟門之外是時西域
使人獻火浣布袈裟於是刊滅此論地鏡圖曰山上
有葦必有金博物志曰妊娠者不可食薑令兒盈指

抱朴子曰山中樹能語者非樹語也其精名曰雲陽
山中夜見火光者皆古枯木所作勿怪也山中午日
稱仙人者老樹也孫綽子曰海人與山客辯其方物
海人曰橫海有魚額若華山之頂一吸萬頃之波山
客曰鄧林有木圍三萬尋直上千里旁陰數國有人
曰東極有大人斬木爲策短不可杖釣魚爲鮮不足
充舖玄中記曰百歲之樹其汁赤如血千歲之樹精
爲青羊萬歲之樹精爲牛

法苑珠林卷第三十七

校譌

支那

法苑珠林卷三十七

三十四

第十五紙

八行至南藏作是

第十七紙

十五行棄南藏作充

第二十

三紙

二行忽南藏作勿

音釋

窖

古孝切地藏也

莒

居呂切

甕

鳥貢切罍也

嶠

語俱切陬也

闐

徒年切于闐國

名

燎 縱力小切

浚

私閭切

紵

直呂切

愠

於問切

濼

乃定切

吐

盍

徒朗切

鵠

昌脂切

窠

余昭切

藹

祖切

濼

泥淖切

切

盍

修補也

窠

猶穴也

藹

依改切

鄆

胡古切

擣

資切

指

許為切

闐

許鴟切

揉

耳由切

飭

于孕切

積

胡感切

有

石者

轆

郎擊切

侶

空旱切

偲

相咨切

襍

房玉切

也

動

梟

古亮切

高

古老切

媁

古候切

振

郎計切

切

壞

自

瘡

疔亮切

癘

郎

漲

知亮切

鞞

丑刃切

竹

力切

蠟

語蹙切

觶

山婢免切

暑

渠脂切

雩

羽俱切

登

以歲

切

蘆

茅山比丘

福登施

資刻此

法苑珠林第三十七卷

吳江比丘明覺對

真

州

趙之昂書

上元末

經刻

萬曆辛卯秋

清涼山妙德庵識

萬曆

辛卯

秋

清涼山

妙德庵

識


真

真

真

真





法苑珠林卷第三十八

唐上都西明寺沙門釋道世玄憚撰

感通篇第二十一之一

述意部

敬尋釋教肇自漢明繼至皇唐政流歷代年將六百
輜軒繼接備盡觀方千有餘國咸歸風化莫不梯山
貢職望日來王而前後傳錄荖互不同事迹罕述稱
謂多惑雖霑餘潤幽旨未圓夷夏殊音文義頗備推
究聖蹤難以致盡故此土諸僧各懷鬱快時有大唐
沙門玄奘法師慨大道之不通愍釋教之抑泰故以

貞觀三年季春三月吊影單身西尋聖迹從初京邑
漸達沙州獨陟險塞伊吾高昌備經危難時值高昌
王麴氏爲給貨資傳送突厥葉護衙所又被將送雪
山以北諸蕃梵國具觀佛化又東南出大雪山昔人
云葱嶺停雪卽是雪山焚親目親過此雪山卽達印
度經十年後返從葱嶺南雪山北具歷諸國東歸于
闐婁蘭等凡經一百五十餘國備歷艱辛人里莫比
至貞觀十九年冬初方達京師奉詔譯經兼勅令撰
出西域行傳一十二卷至今龍朔三年翻譯經論未
似焚法師遊國博聞翻經最多依焚法師行傳王玄

策傳及西域道俗住土所宜非無靈異勅令文學士
等總集詳撰勒成六十卷號爲西國志圖畫四十卷
合成一百卷從于闐國至波斯國已來大唐總置都
督府及州縣折衝府合三百七十八所九所是都督
府八十所是州一百三十三所是縣一百四十七所
是折衝府四州所宜人物別異者並簡配諸篇非此
所明今之所錄者直取佛法聖迹住持別成一卷餘
之不盡者具存大本冀後殷鑒知有廣略矣

聖迹部

西域傳云焚師發迹長安旣漸至高昌得蒙厚禮從

高昌給乘傳送至瞿薩旦那國東境卽漢史所謂于闐國也彼土自謂于道國也東二百餘里有媿摩城中有梅檀立像高二丈餘極多靈異光明疾者隨痛以金薄貼像上痛便卽愈其像本在憍賞彌國是鄔隨行那王所造陵空至此國北曷勞落迦城有異羅漢每往禮之王初不信以沙土盆羅漢乃告敬信者曰却後七日沙土滿城後二日乃雨寶滿街至七日夜果雨土填略無遺人其先告者預作地穴從孔而出時王都城西百六十里路中大磧唯有鼠壞形大如蝟毛金銀色昔匈奴來寇王祈鼠靈乃夜齧人馬

兵箭斷壞自然走退都城西五里許寺有浮圖高百餘尺多現光相王感舍利數百粒羅漢以右手舉浮圖安之函內乃下之無傾動也都城西南十餘里有瞿室稜伽山此云牛角山有寺像現光明佛曾遊此爲天人說法山巖石室有一羅漢入滅心定待彌勒佛其國南界接東女國又從國城西越山谷行八百餘里至斫句迦國卽是沮渠處也國南有山立多羅漢塔松林鬱茂石室淡淨有三羅漢現入滅定鬚髮但長僧常剃之其五印度僧有證果者多止此室又從國西北上大沙嶺度徙多河

舊名新頭河

行五百里至

佉沙國

舊名踈勒國

其俗生子押頭令匾遮從此南行五

百里至烏鐮國都城西二百餘里至大山嶺上有塔數百年前山崖自崩中有比丘冥目而坐形甚偉大鬚髮下垂覆于肩面國王以酥灌之擊捷椎此比丘高視曰我師迦葉波佛在耶答曰無今始聞已入涅槃又問釋迦佛出世耶告曰已滅度矣卽昇空化火焚身又西南逾大葱嶺八百餘里至竭盤陀國其國東南有大石室二口各一羅漢入滅定已經七百歲其鬚髮長年別爲剃又越三國行四千餘里至達摩鐵悉帝國都城寺內有石像上懸金銅圓蓋衆寶飾

之人有旋遶蓋亦隨轉人止便止四周石壁莫測其然有說聖力使之然也自高昌至於鐵門凡經一十六國人物優劣奉信淳踈具諸圖傳其鐵門者卽是漢之西屏鐵門之關見漢門扇一豎一臥外鐵裹木加懸諸鈴必掩此關寔惟天固南出斯門千餘里東據葱嶺西接波斯南大雪山北據鐵門縛芻大河中境西流卽經所謂博艾河其境自分爲二十國不可具列名字各有君長信重佛教僧以十二月十六日安居坐至春分以其溫熱雨多故也又順北下從咀蜜國越十三國至縛喝國土地華博時俗號爲小王

舍城國近葉護南衙也王都城外西南寺中有佛澡
罐可容升許襍色炫曜金石難名又有佛牙長寸餘
廣八九分色黃白而光淨兼有佛掃帚用迦奢草長
二尺餘圍可七寸襍寶飾柄三物齋日法俗所感放
大光明王城西北五十餘里有提謂城王城正北四
十餘里有波利城各有浮圖高三丈許各表靈迹卽
釋迦初成道時元獻蜜麩長者本邑之髮爪塔也又
有佛僧伽胝鬱多羅僧僧脚崎又覆盃豎錫杖次第
立塔又度兩國東南入大雪山至梵衍那國度大雪
山東寺有佛齒及劫初獨覺齒長五寸廣四寸又有

金輪王齒長三寸廣二寸又有商諾迦縛婆

舊云商
那和修

傳法第
三師

大阿羅漢鐵鉢可受九升并九條僧伽胝絳

赤色設諾牁皮之所績成以其先世於解夏日持此
牁施僧由此福力所被五百世來於中陰身生恒服
之從胎俱出逐身而長阿難當度時變爲法服受具
已後又變爲九條其齒鉢等並用金緘之羅漢從證
滅定入邊際智以願力故留袈裟待遺法盡方乃變
壞今已有少損信有徵矣又東入雪山逾黑嶺至迦
畢試國奉信彌勝王恒歲造丈八銀像自修供之王
城東三里北山下有大寺佛院東門南大神王像右

足下有大寶藏近有外王逐僧欲掘取其神冠中鸚鵡鳥像奮羽嗚呼地動王軍皆仆起謝而歸寺北嶺上有數石室亦多藏寶欲私開者卽有藥義舊云變夜義爲師子虵蟲來震怒之室西三里大嶺上有觀自在像誠願者像亦現妙身安言行者城東南四十餘里曷邏怛羅寺大臣所造以名目之浮圖高百餘尺昔臣夜夢令造浮圖從王請舍利也及旦至宮有人持舍利瓶臣留舍利令人先入乃持瓶登塔覆鉢自開安舍利訖王使追之石已合矣齋日放光流出黑油夜聞音樂王都城西北二百餘里大雪山頂有龍池

山下爲龍立寺塔中有佛骨肉舍利升餘有時煙起或如火猛焰漸滅之時方見舍利狀如白珠繞柱入雲還下塔中城西北大河南岸古王寺中有佛弱齒亂齒長一寸餘又此東南往古王寺有佛頂骨一片廣二寸餘色黃白髮孔分明至大唐龍朔元年春初使人王玄策從西國將來今現宮內供養又此寺有佛髮青色螺旋右縈引長丈餘卷可寸許又西南古王妃寺金銅浮圖高百餘尺舍利升餘每十五日夜旋光繞盤曉入塔中城西南北羅婆路山頂盤石上有塔高百餘尺舍利升餘山北巖泉是佛受山神飯

巴漱口嚼楊枝因生今爲茂林寺號楊枝又從龍池東行六百餘里越雪山度黑嶺至北印度界已前並是胡國制服威儀不參大夏名爲邊國蔑烈車此云垢濁也種至此方合中道又東行至濫波國卽是印度之北境言印度者卽是天竺之正名亦名身毒賢豆此並訛號北背雪山三垂大海地形南狹如月上弦川平廣衍周萬九千里七十餘國依一王命又東行百餘里逾大嶺大河至那伽羅曷國屬北印度名花氏城城東二里有石塔高三百尺編石峙起雕鏤非常此卽昔時值燃燈佛授記敷鹿皮衣髮布掩泥之地經

劫猶存此無憂王建此石塔每於齋日天輒雨華又城內大塔故基舊有佛齒別塔高三丈餘云從空而來旣非人工寔多靈異城西南十餘里有塔是佛自中印度凌空來降迹次東有塔是昔值然燈佛買華處又城東二十餘里小石嶺上有塔高二百餘尺東岸石壁大洞穴是龍王所居昔佛於此化龍畱影煥若真形至誠請者乃暫明現塔外方石有佛足迹輪相發光窟西北隅塔者佛經行處又側有髮爪塔窟西石上有濯袈裟文又城東三十餘里有醯羅城中有重閣上安佛頂骨周尺二寸其色黃白髮孔分

明欲知善惡用香泥印之及觀香泥隨心而現又有佛鬘體狀如荷葉色同頂骨有佛眼睛大如柰許清白映徹並用七寶瓶盛前三迹又以寶函盛而絨封有佛大衣細氈黃色置寶函中微有壞相有佛錫杖白鐵作環梅檀爲筭寶銅盛之斯五聖迹王令五淨行者執持掌護有須見者稅一金錢請印稅五科寶乃重觀禮彌繁閣西北有小塔而多靈異人以手觸基上塔鈴便大震動又東南山谷行五百里至健陀邏國屬北印度有大論師如脇尊者造毗婆沙處又有菩薩捨千眼處又有佛化鬼子母處又有商莫迦

菩薩

舊云睽子是也

被王射處又有彈多落迦

舊云檀特山也

山嶺

上是蘇達拏棲隱之所婆羅門捶男女處流血塗地

今現艸木皆同絳色巖間石室妃習定處又有獨角

大仙爲女亂處又此城北越山行六百餘里至烏仗

那國此北印度之正國也

舊云烏長

王都城東五里有大

塔多有祥瑞佛昔作忍仙爲羯利

此云鬪諍

王支解之處

又有方石上佛足迹相放光照寺爲天說本生處又

有佛昔聞法析骨寫經處又有昔尸毗迦王割身代

鴿處又有佛昔爲慈力王刺血飲五藥義處又大寺

中有刻木梅坦麗耶

舊云彌勒

菩薩像金色晃朗高百餘

尺是末田底迦阿羅漢所造舊云末田羅漢也羅漢以通力

引匠昇觀史多天三返觀相乃成其好大有靈相不

可具述又隔一國度河至坦又始羅國屬北印度王

都城西北七十里有兩山間塔高百餘尺佛昔說慈

氏興世四大藏者此地出一又城北十二里有月光

王塔於齋日常放神光仙華天樂近有癩者於塔禮

懺除穢塗香不久便愈身又香潔即是昔佛為戰達

羅鉢刺婆王舊云月光以頭施處凡經千施又有伊羅鉢

龍王聽經之池月光扶目之地育王標塔舉高十丈

又有薩埵王子捨身飼虎處以竹自刺血啗獸處地

及艸木今猶絳色又有佛化藥又不食肉處又隔二

國東南登山乘鐵橋千餘里至迦濕彌羅國屬北印

度舊云剎賓國內有四浮圖各有舍利一升餘佛滅度後

第四百年有脇尊者年八十方出家證無學果將五

百羅漢來此造鄔波第鑠釋素咀纜藏舊名優婆提捨論次

造毗柰耶毗婆沙論次造阿毗達摩論此三論各有

十萬頌凡有六百六十萬言備釋三藏兼有佛牙長

寸半色黃白齋日便放光又有觀自在菩薩立像有

願見者斷食便觀又隔三國東行至那僕底國屬北

印度都城東南五百餘里至暗林寺周二十餘里佛

舍利塔數百千區并石室等有賢劫千佛立此說法
釋迦滅後第三百年迦多衍那舊名迦於此造大智

論寺塔高二十餘丈有四佛行坐迹處又隔四國東

行至秣菟羅國屬中印度舊名摩倫羅國王都城內有三塔

四佛遺迹甚多及舍利子没特伽羅子舊名目連滿慈子

舊名富婁那優婆耆舊名優波離阿難陀羅怙羅曼殊室利等

諸塔每三長月六齋日諸僧尼集供養諸塔有阿毗

達摩眾供養舍利遺塔有習定眾供養目連塔有誦

經眾供養滿慈塔有毗柰耶眾供養優波離塔有尼

眾供養阿難塔有未具眾供養羅怙羅塔有大眾供

養諸菩薩塔

尋此諸塔未必遺身但應立象設供呈心如羅怙羅文殊室利等依經未滅度

唯可知也城東六里有山崖寺是尊者烏波耆多之所造

中有佛指爪塔寺北有石室室東南二十餘里有大

涸池池側有塔佛曾遊此有獼猴持蜜獻佛令水和

徧眾同飲獼猴喜墮坑而死便生人中池北林中有

四佛行處大有遺迹又隔一國東北四百餘里至罕

祿勒那國屬中印度東境臨菟伽河舊名恒河北接大山

城東南閻牟那河從國西北山中出中境而流都城

東臨閻牟河河西大寺東門外塔佛曾於此說法度

人其側有佛髮爪塔閻牟河東八百餘里至菟伽源

廣三四里東南入海廣十餘里水色滄浪味甘砂細
 隨水而流俗謂福水有沐除罪或有輕命自沈乞願
 生天受樂剋有靈感又隔六國於此東南行至劫比
 他國屬中印度中有天祠十所同事大自在天皆作
 天像其狀人根形甚長偉俗人不以為惡謂諸眾生
 從天根生也王都城東二十餘里大寺側大垣內有
 天帝釋為佛造三道寶階中皆附黃金左以水精右
 用白銀南北而列東西下地是佛從逝多林舊云祇
 陀林
 昇天至善法堂為母三月說法下降處百年已前階
 尚猶在今並沒盡後王傲之猶高七十餘尺上起精

舍石側有柱光潤映現隨其罪福影出柱中育王所
 造階側有浮圖四佛行坐迹處又有佛澡浴處立塔
 其所有佛入室精舍又其側佛經行石基長五十步
 高七尺足可覆處皆有蓮華文又基左右小塔梵王
 所造次前是蓮華尼化為輪王先見佛處佛告尼曰
 非汝先也有蘇部底舊云須
 菩提宴坐石室知諸法空此
 先見吾法身也又從此北行二百里至羯若鞠闍國
 是中印度曲女城也都城西近菟伽河長二十餘里
 廣四五里即統五印度之都王也王前尸羅逸多唐
 云
 日吠奢姓初欲登位於菟伽岸有觀自在像乃請告

曰汝本北林蘭若比丘金耳月王既滅佛法王當重
興愍物在懷方王五境慎勿昇師子座及稱大王號
也王乃共童子王子殄外道月王徒衆又約嚴令有
噉肉者當截舌殺生者當斬手乃與寡妹共知國事
於菟伽側建千餘浮圖各高百餘尺二十年來五年
一會傾及府藏拯濟羣有唯留兵器用備不虞初作
會日集諸國僧三七日中四事供養令相論議若戒
行貞固道德優洽者昇師子座王便受戒清淨無學
示有崇仰穢行彰露者驅出國界城西北育王所造
昔佛於此七日說法其側有髮爪塔四佛行坐迹又

南臨菟伽寺有佛牙長寸半光色變改寶函盛之遠
近瞻者日有百千守者煩擾重稅金寶而樂禮者不
辭重貨齋日便出置高座上散華雖積牙齒不沒又
城東南百餘里有塔佛曾七日說法處中有舍利時
放光明其側有佛行坐迹寺北四里臨菟伽河有塔
佛曾七日說法五百餓鬼解悟生天其側又有髮爪
塔次側又有四佛行坐迹又至阿輸陀國屬中印度
都城北五里菟伽河岸大寺中塔佛爲天人三月於
此說法有四佛行坐迹次西五里有佛髮爪塔城西
南五里大庵沒羅林中故寺是阿僧伽菩薩夜昇天

宮於彌勒所受瑜伽莊嚴大乘經論及中邊論等書
下爲衆說之林西北百餘步有佛髮爪塔城東南臨
碗伽有塔佛曾三月說法處有髮爪青石塔有四佛
行坐迹又隔二國東南行至鉢羅伽耶國屬中印度
王城西南臨閼牟河曲中有塔佛曾於此降外道處
有髮爪塔經行迹處又有提婆菩薩作廣百論處城
中有天祠堂前大樹枝葉蒙密有食人鬼依之左右
遺骸爲積人至祠中無不輕命上樹投下爲鬼所誘
城東兩河間交廣十餘里土地平豐細沙彌布古今
王豪諸貴諸有捨施莫不止焉號爲大施場戒日大

王亦修此業場東合流口日數人自溺而死彼俗名
爲生天所也有欲行此法者於七日中絕粒自沈中
流遠近相趣乃至山猿野獸羣鹿等亦遊水濱絕食
沈死當戒日王行施之時有二獼猴雌爲狗殺雄者
負屍擲此河中雄者又自餓累日而死又從此西南
大林野行五百餘里至僑償彌國屬中印度王城內
故宮大精舍高六十尺刻檀佛像上懸石蓋卽鄔陀
行那王舊云憂陀延王唐云出愛之所造也靈光間起諸王以力
欲舉終莫之移昔佛爲母上天說法王請目連神力
接工就天摸相及佛下天像便起迎佛慰喻曰方爲

佛事舍東百餘步四佛行坐迹佛浴室并今猶充汲
 城內東南隅有具史羅長者宅有佛精舍髮爪塔有
 四佛行坐迹城西九里石室有佛降毒龍處側有大
 塔高二十餘丈有佛經行迹及有髮爪塔病求多愈
 又有釋迦遺法滅盡在此國中貴賤入境自然感傷
 窟東北行七百里度旃伽北岸至迦奢布羅城是護
 法菩薩伏外道處佛曾於此六月說法有佛經行迹
 及有髮爪塔又從此北行一百八十里至鞞索迦國
 屬中印度王城南有寺塔高二十餘丈佛曾於此六
 年說法其側有奇樹高七十尺春冬不改是佛淨齒

木葉而茂生諸邪外道競欲殘伐尋生如故伐者受
 殃側有四佛行坐迹并有髮爪塔基角相連林池交
 影又從此東北五百里至室羅伐悉底國屬中印度

舊云舍衛國也

都城荒毀故殿東基上有小塔是鉢羅犀那

恃多王

舊云波斯國唐言勝軍也

比丘尼造精舍處次東塔是蘇

達多

此云善施

之故宅也側有大塔是鴛窠利摩羅

此云指髮

捨邪處城南六里許有逝多林是給孤園太子所造
 寺也今荒廢之尚有石柱高七十餘尺育王造之甄
 室一存餘並湮滅室中有為母說法金像東北有佛
 洗病僧塔西北有目連舉身子衣塔不遠有井塔佛

可汲用又有舍利弗與佛經行道說法處並有表塔
 靈樂異香常降其所又有外道殺女以陰謗佛立塔
 表處寺東百餘步大溪坑是調達欲毒害佛生身陷
 處又南有大坑是瞿伽離比丘毀佛生身陷處又南
 八百步大溪坑是戰遮婆羅門女毀謗佛生身陷處
 此三大坑皆溪洞達無底縱有洪雨大注終無停偃
 寺東七十步有精舍名曰影覆高六十尺中有東面
 坐像與外道論處次東天祠量同精舍初日影西不
 蔽佛舍晚日蔭東遂覆天祠又東四里大涸池是毗
 盧釋迦王舊云瑞陷入地處後人立記之又有身子

王也

初造寺時與外道搆處亦立塔記寺西北四里有得
 眼林中有佛經行迹塔其緣勝軍王挾五百賊眼聞
 佛慈力一時平復捨杖遂生城西北六十里故城是
 人壽二萬歲時迦葉波佛本生處其北卽是此佛全
 身舍利之所育王造塔表記之處又東南行五百里
 至劫比羅伐罕堵國屬中印度舊云迦毗羅國故城無人住
 城內正殿基上精舍中作王像其側是摩訶摩耶唐
 術夫人寢殿基上精舍作夫人像其側精舍中作菩
 薩像神降之相彼執不同上座部云當唐國五月十
 五日諸部又云當此土五月八日此益見聞之異耳

城南有塔是太子搆力擲象越城墮地爲大坑處其側有精舍作太子像及受業處其傍有精舍是妃寢處作耶輸陀羅并羅怙羅像別本云太子初夜開城北門出去又城東南隅精舍中作太子乘白馬凌空踰城處四城門各有精舍作老病死沙門像城南四里尼拘盧林塔佛得道與夫人說法之所城南五十里故城中塔是人壽六萬歲時迦羅迦村馱佛本生城城東南塔卽此佛遺身處無憂王於前建立石柱高三丈又東北三十餘里故城中塔是人壽四萬歲時迦諾迦牟尼佛本生城城東北塔卽此佛遺身處

無憂王爲建立石柱銘記之高二丈餘城東北四十餘里有太子生樹下塔大城西北數百千塔是誅釋子塔有四釋子拒王軍衆璫璃王退城人不受被罰出境至今不絕城南尼拘律樹塔是佛初來見父王處城南門外塔是太子兄弟搆射處東南三十餘里是太子射矢沒地因涌泉流俗傳箭泉病飲多愈或持泥附額隨苦皆愈又東北九十里臘伐尼林釋種浴池華水相映其北二十五步有無意華樹今已枯悴佛本誕處有說云當此三月八日者上座部云當此三月十五日者次東有塔二龍浴太子處佛初生

已不扶而行四方各七步所蹈之處出大蓮華既右
脇生天帝衣接四王捧之置金几上几施四塔并立
石柱表之傍有小河東南而流俗號油河是太子產
已天化此池光潤令沫以除風虛今變水河尚膩如
油又從此東行二百餘里荒林中至蓋摩國屬中印
度都城空城東南有佛塔減百尺昔初八分之一分
舍利也靈光時起其側有清池龍變爲虵出繞其塔
有野象採華以散之無憂王欲開龍護不許又東大
林百餘里大塔是太子至此解寶衣中末尼珠付闍
鐸迦還父王處又東有瞻部樹枯株尚在有小塔是

太子以餘衣易麤布處其側塔者剃髮處年自不定
或云十九二十九者又東南行百九十里屈拘陀林
塔高三丈是昔人於佛焚地收餘灰炭於此起塔病
者祈愈亦有四佛行坐迹塔高百餘尺左右數百小
塔又從此東北大林踈險行五百里至拘尸那揭羅
國屬中印度城荒人少城內東北角塔是純隨故宅
其井猶美營供所穿城西北四里度阿恃多伐底河
唐云有金近西岸娑羅林兩林中間相去數十步中有四
樹特高作大輓精舍中造佛涅槃像北首而臥傍高
二百餘尺前有石柱記佛滅相有云當此土三月十

五日者說有部云當此九月八日諸部異議云至今龍朔三年則經一千二百年此依菩提寺石柱記也或云一千三百年或云一千五百年或云始過九百未滿千者其精舍側有佛昔為雉王救火及鹿救生各立一塔次西塔者是蘇跋隨羅唐云善現滅證處次有一塔是執金剛神躡地處次側一塔是停棺七日處次側一塔是阿泥樓隨上天告母降來哭佛處城北度尸連禪那河三百步塔者是佛涅槃般那處唐云焚燒地今黃黑土襍灰炭有所感者剋獲舍利次側一塔佛為大迦葉波現雙足處次有一塔前立石柱刻記

八國分舍利事又從此西南大林行五百里至婆羅痾斯國屬中印度舊云波羅奈也都城西臨菟伽河城居人滿城東北有婆羅痾河河東北十餘里是鹿野寺又西南塔高百餘尺前有石柱高七十餘尺洞徹清淨誠感像現隨其善惡佛成道已初轉法輪處其側三塔即昔三佛行坐處傍有諸塔是五百獨覺入滅度處又側一塔是慈氏菩薩受記處又西一塔是佛過去為護明菩薩迦葉波佛授今佛成道處處次南有四佛經行處長五十步高七尺青石積成上作釋迦經行像其形特異肉髻上鬚髮頭抽出神而有徵寺迹

極多精舍浮圖乃有數百事難述盡寺西有清池周
三百步佛昔盍浴次西小池佛嘗滌器處次北小池
佛嘗有浣衣處次之三池龍止其中味甘且淨有慢
觸者金毗羅獸卽而害之次側有方石上有佛袈裟
文迹外道凶人有輕蹈者池龍輒興風雨害之次側
有浮圖佛曾作六牙象王見獵師者被法衣故拔牙
與處次又一塔佛昔爲象與猴相問大小處又大林
中塔佛與調達昔爲鹿王佛代孕鹿命處鹿野之號
因此得名寺西南三里有一塔是五人迎佛處又大
林東三里有塔佛昔爲兔與諸獸聚自知形小燒身

饋之因感天帝下來讚故使月輪有兔像現又東順
碗伽河行三百里至戰王國都城大滿城臨碗伽河
城西北有寺塔佛舍利一升昔佛於此七日說法并
四佛行處河北有佛降鬼塔半已陷地又有佛爲噉
人鬼說法處又東南度河百餘里塔者卽分舍利瓶
及餘舍利齋日放光又東北度碗伽河行百五十餘
里至吠舍釐國屬中印度舊云毗舍離國都城頽毀故基周
七十里少人居住宮城周五里宮西北六里有寺塔
是說維摩經處又東是舍利子證果塔又東大塔是
王得一分舍利一斛許無憂王取九升均造餘塔後

更有王欲開地震遂止次南有獼猴爲佛穿池池西羣猴持佛鉢上樹取蜜處池南猴奉佛蜜處各有塔記寺東北四里許有塔是維摩故宅基尚多靈神其舍壘輒傳云積石卽是說法現疾處也於大唐顯慶年中勅使衛長史王玄策因向印度過淨名宅以笏量基止有十笏故號方丈之室也并長者寶積宅菴羅女宅佛姨母入滅處皆立表記寺北四里有塔佛將往拘尸天人送往立處次後一塔是佛最後觀城邑處次是菴羅女以園施佛處其側一塔是佛三告阿難涅槃處又側一塔是千子見父母處卽賢劫千

佛也東故重閣講堂基塔時放光明是佛說普門住處城東南十五里大塔是七百賢聖重結集處兢伽河南北岸各有一塔是阿難陀分身與二國處又隔一國西北行一千五百里入山谷至尼波羅國屬北印度都城東南不遠有水火村東一里許有阿耨波洑水周二十步旱澇湛然不流常沸家火投之徧池火起煙焰數尺以水灑火火更增熾碎土以投亦卽然盡無間投者並成灰燼架釜水上煮食立熟賢德傳云此水中先有金匱前有國王將人取之匱已出泥人象挽之不動夜神告曰此是慈氏佛冠在中後

彌勒下生擬著不可得也火龍所護城南十餘里孤山特秀寺居重疊狀若雲霞松竹魚龍隨人馴附就人取食犯者滅門比者國命並從此國而往還矣卽東女國與吐蕃接界唐梵相去可一萬餘里又從南行百五十里度旃伽河至摩揭陁國屬中印度城少人居邑落極多故城在五舍城山北倚東二百四十里北臨旃伽河故宮北石柱高數丈昔無憂王作地獄處是頻婆娑羅王之曾孫也王卽戒日之女婿也所治城名華氏城王宮多華故因名焉石柱南有大塔卽八萬四千之塔一數也安佛舍利一升時有光

瑞卽は無憂王造近護羅漢役鬼神所營其側精舍中有大石是佛欲涅槃北趺拘尸南顧摩揭故蹈石上之雙足迹長尺八寸廣六寸輪相華文十指各異近爲惡王金耳毀壞佛迹鑿已還平文采如故乃捐旃伽河中尋復本處貞觀二十三年有使圖寫迹來次側有四佛行坐迹塔故城東南有龍猛菩薩伏外道處次北有鬼辨塔馬鳴事又西南度尼連禪河有伽耶城少人物可千餘家城西南六里許至伽耶山谿谷杳冥世謂靈岳自古君王封告成也頂有石塔高百餘尺時放奇光佛於此說寶雲等經山東南尼

連河減二里許至鉢羅笈菩提山唐言正覺佛時證
先登因名也佛自東北崗上頂欲入金剛定振地搖
山神懼告佛又至西南半崖中面間坐石地山又震
淨居天告曰此西南十五里近苦行處畢鉢羅樹下
金剛座處是菩提座三世諸佛咸此成正覺佛方就
之仍爲石室龍留影也世稱名地其菩提樹周垣甃
壘以崇固之東西闊周可五百四十步奇樹名花連
陰列植正門東開對尼連河南門接大花池西阨險
固北門通大寺其院內聖迹諸塔列多樹垣正中金
剛座上者賢劫初成與大地俱大千界中下極金輪

上至地際金剛所成周百餘步千佛同坐入金剛定
故因號焉卽證道之處又曰道場大地震時獨無搖
也如來得道之日互說不同或云三月八日及十五
日垣北門外大菩提寺六院三層垣牆高四丈壘甃
爲之師子國王買取此處與造斯寺僧徒僅千大乘
上座部所住持也有骨舍利狀如人指節舍利者大
如真珠彼土十二月三十日當此方正月十五日也
世稱大神變月若至其夕必放光瑞天雨奇花充滿
樹院彼土常法至於此時道俗千萬七日七夜競申
供養凡有兩意謂觀光瑞及取樹葉其樹青翠冬夏

不改每至入涅槃日及以夏末一時彫落通夕新抽與舊齊等後爲無憂王妃伐截於西數千步聚而燒之用以祠天煙焰未止忽生兩樹猛火之中茂葉同榮因謂號爲灰菩提樹王親生信以香乳溉餘根者至旦樹生如本王妃忿之又夜重伐王重新請以乳灌之不日還生壘石周垣其高丈餘近爲金耳國月王又伐此樹掘至泉水不盡根底乃縱火焚之又以甘蔗澆之令其爛絕其本也數月之後爲補刺拏伐摩王此言滿胄卽先無憂王之玄孫也聞樹被誅舉身投地請僧七日經行繞樹大坑以數千牛乳灌之

六日夜樹生丈餘恐後翦伐周峙石垣高二丈四尺樹今出於石壁上二丈餘圍三尺餘樹東青靛精舍高百六十餘尺基廣二十餘步上有石鈎欄繞之高一丈層龕皆有金像四壁鏤諸天仙上頂金銅阿摩勒迦果

此謂寶瓶卽寶臺也

東却接爲重閣三層簷宇特異並

金銀飾鏤三重門外龕中左觀自在右慈氏像並鑄銀成高一丈許是無憂王造精舍初小後巨廣之依王玄策行傳云西國瑞像無窮且錄摩訶菩提樹像云昔師子國王名尸迷佉拔摩

唐天功德雲

梵王遣二比丘來詣此寺大者名摩訶誦

此云大名

小者優波

此云授記

其

二比丘禮菩提樹金剛座訖此寺不安置其二比丘
乃還其本國王問比丘往彼禮拜聖所來靈瑞云何
比丘報云閻浮大地無安身處王聞此語遂多與珠
寶使送與此國王三謨陁羅崛多因此以來卽是師
子國比丘又金剛座上尊像元造之時有一外客來
告大衆云我聞募好工匠造像我巧能作此像大衆
語云所須何物其人云唯須香及水及料燈油艾料
旣足語寺僧云吾須閉門營造限至六月慎莫開門
亦不勞飲食其人一人卽不重出唯少四日不滿六
月大衆評章不和各云此塔中狹迤復是漏身因何

累月不開見出疑其所爲遂開塔門乃不見匠人其
像已成唯右妳上有少許未竟後有空神驚誡大衆
云我是彌勒菩薩像身東西坐身高一丈一尺五寸
肩闊六尺二寸兩膝相去八尺八寸金剛座高四尺
三寸闊一丈二尺五寸其塔本阿育王造石鉤欄塔
後有婆羅門兄弟二人兄名王主弟名梵主兄造其
塔高百肘帝造其寺其像自彌勒造成已來一切道
俗規模圖寫聖變難定未有寫得王使至彼請諸僧
衆及此諸使人至誠殷請累日行道懺悔兼申來意
方得圖畫髣髴周盡直爲此像出其經本向有十卷

將傳此地其匠宋法智等巧窮聖容圖寫聖顏來到
京都道俗競摸焚師傳云像右乳上圖飾未周更填
衆寶遙看其相終以不滿像坐跏趺右足跏上左手
歛右手垂所以垂手者像佛初成道時佛與魔王指
地爲證近被月王伐樹令臣毀像王自東返臣本信
心乃於像前橫施輒鄣心愧暗故置燈於內外畫自
在天像功成報命月王聞懼舉身生炮肌膚皆裂尋
卽喪沒大臣馳報卽除壁鄣往還多日燈猶不滅今
在淡室晨持鏡照乃覩其相見者悲戀敬仰忘返又
依王玄策傳云此漢使奉勅往摩伽陀國摩訶菩提

寺立碑至貞觀十九年二月十一日於菩提樹下塔
西建立使典司門令史魏才書

昔漢魏君臨窮兵用武興師十萬日費千金猶尚北
勒闐顏東村不到大唐牢籠六合道冠百王文德所
加溥天同附是故身毒諸國道俗歸誠皇帝愍其忠
欵遐軫聖慮乃命使人朝散大夫行衛尉寺丞上護
軍李義表副使前融州黃水縣令王玄策等二十二
人巡撫其國遂至摩訶菩提寺其寺所菩提樹下金
剛之座賢劫千佛並於中成道觀嚴飾相好具若眞
容靈塔淨地巧窮天外此乃曠代所未見史籍所未

詳皇帝遠振鴻風光華道樹爰命使人屆斯瞻仰此絕代之盛事不朽之神功如何寢默詠歌不傳金石者也乃為銘曰

大唐撫運

膺圖壽昌

化行六合

威稜八荒

身毒督額

道俗來王

爰發明使

瞻斯道場

金剛之座

千佛代居

尊容相好

彌勒規模

靈塔壯麗

道樹扶踈

歷劫不朽

神力焉如

法苑珠林卷第三十八

校譌

第七紙

十二行柰宋南藏作榛

第二十四紙

十四行與宋南藏作語

音釋

輻

于求切

翹

苦剝切

蕃

甫元切

媿

古媿切

蝟

于位切蟲似

方緬切

鏹

桑轄切

罐

古玩切

盃

北未切

績

則歷切

邏

方緬切

齡

呂經切謂

齒

初觀切

峙

池爾切

雕

都耶切

笱

古旱切

鑠

書藥切

秣

莫葛切

苑

同都切

涸

下各切

積

古旱切

鴛

於良切

窶

其矩切

湮

於真切

掬

古岳切

萃

府核切

踰

羊朱切

嶮

虛儉切

疵

女黠切

饋

求位切

艾

呂支切

頽

徒回切

汜

郎計切

阨

於革切

漑

古代切

五蓋軫章忍切

動也

蘆芽山比丘福登施賢刻此

法苑珠林第三十八卷

吳江比丘明覺對


真

州趙之昂書

進賢吳國泰刻

萬曆辛卯冬

清涼山妙德庵識



法苑珠林卷第三十九

唐上都西明寺沙門釋道世玄憚撰

感通篇第二十一之餘

聖迹部之餘

又契師傳云佛以唐國三月八日成道上座部云當此三月十五日成道時年三十者或云三十五者斯之差互彼自不同由用曆前後故有此異由神州曆筭元各不同三代定正延縮何足恠乎且據一相取悟便止樹西大精舍內有鍤石像東面立飾以奇珍前有青石奇又如來初成道日梵王起七寶堂帝釋

起七寶座佛據上七日思惟放光照樹令寶爲石樹
南浮圖高百餘尺初佛於河沐已將坐念艸帝釋化
人以始尸艸此云吉
祥艸以奉佛坐育王造塔表之次東
北有塔是佛證果時有羣青雀來繞世尊亦有羣鹿
呈祥之處樹東大路左右各有一塔是魔王燒佛衰
退處樹西北有精舍中迦葉波佛時放光明俗云至
誠七遠生得宿命智又垣西北有鬱金香泥塔高一
丈四尺樹垣東南隅有尼拘律樹樹側有塔精舍中
有坐像初證果時大梵王請轉法輪處垣內四隅皆
有塔初佛受艸趣樹先至西南地動又向西北又東

北又東南並爲地動卽西北至樹下東面坐金剛座
上地方安靜故立塔記垣外西南有二牧牛女宅處
其側有煮乳糜處又側有佛受糜處皆立表塔樹南
門外大池周七百餘步清澄魚龍所宅次南有池是
帝釋所造爲佛濯衣池西大石是帝釋雪山持來爲
佛曬衣次側有塔是佛納故衣處次南林中一塔是
佛受貧母施故衣處化池東林龍池清潔其水甘美
岸西有小精舍中像佛初成道此坐七日入定龍王
遶佛七而化多頭蓋佛處龍池東林精舍作佛羸瘦
形像其側有經行迹七十餘步南北各有畢鉢羅樹

往來攀而後起卽是苦行六年日食一麻一麥處今有疾者以香油塗像多愈又有五比丘住處又東南有塔是佛入尼連河浴處次近河有佛食乳糜處其側有二塔是長者獻蜜麩處樹東南塔是四天王奉佛石鉢處其側有塔是佛成道後爲母說法處又度迦葉兄弟千人處樹垣北門外卽是摩訶菩提寺庭宇六院觀閣三重周垣高五丈有佛舍利大如指節光潤鮮白通徹内外肉舍利者大如青珠形帶紅色每年至佛大神變月出以示人卽印度十二月三十日於唐國當正月十五日於此之時放光雨華大起

漢信其寺常有千僧習大乘上座部法儀清肅是南海僧伽羅國王請立經今四百年寺多有師子國人每年比丘解安居訖四方道俗百千萬衆七日七夜香華妓樂徧林供養印度諸僧以唐國五月十六日入夏安居以唐國八月十五日解夏斯亦隨方用曆不同不可一定如雪山北有國坐春坐秋者意以一年之內多溫熱處制三月住就中前後一月延促不定若據修道何時不安故律制三時遊行通結有罪必有善緣亦開兼濟樹院東度河大林中塔北池者佛昔爲香象子侍育象母處前建石柱昔迦葉波佛

於此宴坐側有四佛行坐迹林中小石柱是斲頭藍

發惡願處又東度黃河百餘里至屈屈吃播陁山

舊名

雞足直上三峯狀如雞足頂樹大塔夜放神炬光明通

照卽大迦葉波於中寂定處也初佛以姨母織成金

縷大衣袈裟傳付彌勒令度遺法四部弟子迦葉承

佛教旨佛涅槃後第二十年捧衣入山以待彌勒山

路極梗澀多諸林竹師子虎象縱橫騰倚瑒法師至

彼每思登踐取進無由瑒乃告王請諸防援蒙王給

兵三百餘人各備鋒刃斬竹通道日行十里爾時彼

國聞瑒往山禮拜士女大小數盈十萬奔隨繼至共

往雞足旣達山阿壁立無路乃縛竹爲梯相連而上
達山頂者三千餘人四睇欣然轉增喜踊具覩石鐸
散華供養又依王玄策傳云粵以大唐貞觀十七年
三月內爰發明詔令使人朝散大夫行衛尉寺丞上
護軍李義表副使前融州黃水縣令王玄策等送婆
羅門客還國其年十二月至摩伽陁國因卽巡省佛
鄉覽觀遺蹤聖迹神化在處感徵至十九年正月二
十七日至王舍城遂登耆闍崛山流目縱觀傍眺罔
極自佛滅度千有餘年聖迹遺基儼然具在一行一
坐皆有塔記自惟器識邊鄙忽得躬覩靈迹一悲一

喜不能裁抑因銘其山用傳不朽欲使大唐皇帝與日月而長明佛法弘宣其此山而同固其辭曰

大唐出震膺圖龍飛光宅率土恩覃四夷化高三五德邁軒羲高懸王鏡垂拱無爲其道法自然儒宗隨

世安上作禮移風樂制發於中土不同葉裔釋教降

此運於無際其神力自在應化無邊或涌於地或降

於天百億日月三千大千法雲共扇妙理俱宣其鬱

乎此山竒狀增多上飛香雲下臨澄波靈聖之所降

集賢懿之所經過存聖迹於危峯竚遺趾於巖阿其

參差嶺嶂重疊巖廊鏗鏘寶鐸氛氲異香覽華山之

神蹤勒貞碑於崇崗馳大唐之淳化齊天地之久長

其五

又契師傳云從此山東行六十里至矩奢揭羅補羅

城北門外有塔佛舒手現五師子伏提婆醉象處又

東北塔是舍利子聞馬勝比丘說法證聖處塔北大

坑傍塔是室利毘多設火坑以害佛處又東至姑栗

陀羅矩吒山此云鷲峯亦云鷲傍有大石高丈四五

廣三十餘步是提婆達多擲佛處其南崖下有塔佛

此處說法華經處南山崖有大石室佛舊入定阿難

別室被魔怖之以手通石摩頂現有通穴精舍東北

大石是佛曬衣處衣文明徹石內傍有佛迹山城北
門西有毗布羅山西南崖昔有五百溫泉今猶數十
泉西畢鉢羅石室佛昔恒居後壁洞穴是阿素洛宮
山北門外一里至迦蘭竹園精舍東大塔是阿闍多
没吐路唐云未生怨也卽是阿闍世王也竹園西南六里許
南山陰大竹林中有大石室是大迦葉波與千羅漢
於此集三藏處僧中上座卽號爲上座部石室西北
塔是阿難受責證果處山城之北可五里許至曷羅
闍姑利唄唐言新王舍城南門外道左塔者度羅怛
羅處又北三十餘里至那爛陀寺唐云施無厭寺瞻部洲中

寺之最者勿高此矣五王共造供給倍隆故因名焉
其寺都有五院同一大門周閭四重高八丈許並用
甃壘其最下壁猶厚六尺外墉三重牆亦甃壘高五
丈許中間各遶極深池塹備有華香嚴麗可觀自置
已來防衛清肅女人妬濫未曾容隱常住僧衆四千
餘人外客道俗通及邪正乃出萬數皆周給衣食無
有窮竭故復號施無厭也中及左右聖迹重疊不可
殫記有諸論師智識清遠王給封戶乃至十城漸降
量賞不減三城其寺現在受封大德三百餘人通經
已上不掌僧役重愛學問諮訪異法故烏耆巴西被

於海內諸出家者皆多義學任國追師都無隔礙王雖守國不敢遮障又東行入山二百餘里至伊爛拏國見佛坐迹入石寸許長五尺二寸廣二尺一寸有瓶迹没石寸許八出華文都似新置有佛立迹長尺八寸強闊六寸許又隔七國西北行至羯羅拏國邪正兼事別有三寺不食乳酪是調達部僧也又西南行七百里至烏荼國東境臨海有發行城多有商旅停於海濱次南大海中有僧伽羅國謂執師子是也相去約指二萬餘里每夜南望見彼國中佛牙塔上寶珠光明騰焰暉赫現於天際又西南行具經諸國

並有異迹可五千里至憍薩羅國即南印度之正境也崇信彌篤王都西南三百餘里有黑蜂山是昔大王為龍猛菩薩造立斯寺舊云龍樹其寺上下五重鑿石為之引水旋注多諸變異沿彼達上今淨人固守罕有登者龕中石像形極偉大寺成之日龍猛就山以藥塗之變成紫金世無等者又有經藏甲傳無數古老相傳盡初結集並現存存雖外佛法屢遭誅殄而此一山住持無改近有僧來於彼夏坐但得讀誦不許持出具陳此事但路幽阻難可尋問又南行至案達羅國屬南印度都城西南二百餘里孤山嶺上石

塔卽是陳那菩薩造因明論處又南行千里至馱那
 羯磔迦國屬南印度都城東西據山間各有大寺昔
 王爲佛造殿山踈石製極華博賢聖遊息佛滅未有
 千年前其處有千凡僧安居罷日皆證無學凌空飛
 去今寂無人其處有婆毗吠伽論師唐云明辯卽是般若
 燈論主也於觀自在前絕粒而飲水三年立志祈請
 待見彌勒觀自在乃爲現色身又在城南大山巖執
 金剛神所誦金剛呪三年神授方去此巖石內有阿
 素洛宮如法祈請石壁當開可卽入中待彌勒出我
 當相報又經三年然呪芥子擊於石壁豁卽洞開時

百千衆觀覩驚歎論師跨門再三顧命唯有六人從
 入餘者謂是毒蛇窟也當卽石門還合如壁又復南
 行六千餘里至秣羅矩吒國卽瞻部最南際海濱境
 也山出龍腦香及有白檀香樹又有羯薩羅香樹松
 身無葉香如冰雪卽龍腦香也從此南大海中有天
 宮觀自在菩薩常所住處舊云觀世音菩薩也臨海有城卽是
 古師子國入海中可三千里非結大伴則不可至自
 此西北四千餘里中途經國具諸神異國東南隅數
 千里那羅誓羅洲人長三尺鳥喙唯食椰子又至摩
 訶刺他國其王自在未賓戒日寺有百餘僧徒五千

東境山寺羅漢所造有大精舍高百餘尺中安石像長八丈餘上施石蓋凡有七重處懸空中相去各三尺禮謁見者無不歎異傳云羅漢願力所持或云藥呪術力所持又越二國西北至摩臘婆國屬南印度都城西北二十餘里有大婆羅門邑側大陷坑水流無滿是昔大慢婆羅門謗大乘生陷入地獄處又西北至阿吒釐國屬南印度此國出胡椒熏陸香樹葉如棠又周巡西北越十餘國至波刺斯國非印度所攝此國多出金銀鍮石頗胝水精死多棄屍佛鉢在王宮中西北接拂壇國出白狗子本赤頭鴨生於穴

中案梁貢職圖云去波斯北一萬里西南海島有西女國非印度攝拂壇年別送男夫配焉略陳聖迹依如前述具列俗紀備存大本頌曰

希音遠流

乃眷東顧

欣風慕道

仰規西度

妙盡毫端

運微輕素

託采處凝

殆映霄霧

迹流衆像

理深其趣

寄興開襟

引凡聖路

千佛同化

萬賢來曙

皇情有感

緇素同遇

住持篇二十二之一

述意部

夫法不自弘弘之在人人通邪正法逐人訛將欲住持三寶必須德行內充律教一宗兼先諳究不憚勞苦不好聲譽令遐邇道俗欣心有據界中行者慕崇進業緇素相依法得久住故四分律云非制不制是制便行如是漸漸令決久住若法出恒情言無規矩翻同鄙俗何成匡眾宜自私退省已爲人故律云非制而制是制便斷如是漸漸令法速滅數見朝貴門首多有療病僧尼或有行醫針灸求貪名利或有誦博歌戲不護容儀或有婚姻相託媒嫁男女或有科

歛酒肉公然聚會或有服玩奢華馳騁衣馬或有執腕抵掌類同賤俗或有結構惡友朋伏麤人致使穢響盈路汗染俗情貴勝同知聞徹天聽於是雷同總撥枉濫清人非直僧尼不依聖教亦由白衣不識賢良寔因一二凡僧毀謗無量好衆或有勤求學問博知三藏或有講道利生無闕四時或有專居禪思常坐不卧或有讀誦經論常勤匪懈或有六時行懺晝夜行道或有納衣乞食儉素無爲或有山居蘭若頭陀苦行或有專營福利供養三寶或有興建齋講化俗入道或有營造經像締構伽藍如是略列疇能殫

撰述
法苑珠林卷三十一
記此之名德常依道場專行福智寸陰不遺無暇染俗或以公貴不識唯共鄙徒結友情密染習既久以非爲是縱覩聖僧將爲凡衆唯生瞋慢何曾加敬靜思此事豈非濫敷

治罰部

自大聖西隱正教東流佛法付囑國王令加護持但王法寢移日就衰羸持犯憲章漸將殆盡若聞說者反被凌辱以道俗濫惡情乖日久設欲治罰改惡就善恃官勢力枉壓清人僧衆無力反汗淨心其懷轉姦實難挫伏致使大教息用遺風訛替故大集經云

若未有諸王四姓爲護法故能捨身命寧護一如法比丘不護無量諸惡比丘是王捨身生淨土中若隨惡者是王無量世中不復人身王等不治則斷三寶奪衆生眼雖無量世修施戒慧則爲滅失又犯過比丘應須治者一月兩月苦使或不與語不與共坐或擯出一國乃至四國有佛法處治如是等惡比丘諸善比丘安樂受法故使佛法久住不滅又薩婆多論云違王制故得突吉羅罪又勝鬘經云世尊應折伏者而折伏之應攝受者而攝受之何以故以折伏攝受故令正法得久住天人充滿惡道減少於如來所

轉法輪而得隨轉又涅槃經云善男子諦聽諦聽當為汝說如來所得長壽之業菩薩以是業因緣故得壽命長欲得長壽應當愍念一切衆生同於子想生大慈大悲大喜大捨受不殺戒教修善法亦當安置一切衆生於五戒十善復入地獄餓鬼畜生阿修羅等一切諸惡趣拔濟是中苦惱衆生脫未脫者度未度者未涅槃者令得涅槃安慰一切諸恐怖者以如是等業因緣故菩薩則得壽命長遠於諸智慧而得自在隨所壽終生於天上迦葉菩薩白佛言世尊於佛法中有破戒者作逆罪者毀正法者云何當於如

是等人同子想耶佛告迦葉善男子譬如國王諸羣臣等有犯王法隨罪誅戮而不捨置如來世尊不如是也於毀法者與驅遣羯磨訶責羯磨置羯磨舉罪羯磨不可見羯磨滅擯羯磨未捨惡見羯磨善男子如來世尊與謗法者作如是等降伏羯磨為欲示諸行惡之人有果報故我涅槃已隨其方面有持戒比丘威儀具足護持正法見壞法者即能驅遣訶責徵治當知是人得福無量不可稱計乃至若善比丘見壞法者置不訶責驅遣舉處當知是人佛法中怨若能驅遣訶責舉處是我弟子真聲聞也又云如來今

以無上正法付囑諸王大臣宰相比丘比丘尼優婆塞優婆夷是諸國王及四部衆應當勸勵諸學人等令得增上戒定智慧若有不學是三品法懈怠破戒毀正法者王者大臣四部之衆應當苦治又經云若有比丘供身之具亦當豐足復能護持所受禁戒能師子吼廣說妙法謂修多羅乃至阿浮陀達磨以如是等九部經典爲他廣說利益安樂諸衆生故唱如是言涅槃經中制諸比丘不應畜養奴婢牛羊非法之物若有比丘畜如是等不淨物者應當治之如來先於異部經中說有比丘畜如是等非法之物某甲

國王如法治之驅令還俗若有比丘能作如是師子吼時有破戒者聞是語已咸共瞋恚害是法師是說法者設復命終故名持戒自利利他以是緣故我聽國主羣臣宰相諸優婆塞等護說法人經中廣明覺德比丘護正法時制諸比丘不得破戒畜非法物破戒徒衆聞是語已便來害之時有國王名曰有德沒命護持覺德比丘與共戰鬪救得法師從是之後常得值佛乃至二人皆得成佛自指云爾時王者則我身是說法比丘迦葉佛是爲護法故皆得成就是金剛身又云我涅槃後濁惡之世國土荒亂互相抄掠

人民饑餓爾時多有為饑餓故發心出家如是之人
 名為禿人是禿人輩見有持戒威儀具足清淨比丘
 護持正法驅逐今出若殺若害迦葉菩薩白佛言世
 尊是持戒人護正法者云何當得遊行村落城邑教
 化善男子是故我今聽持戒者依諸白衣持刀杖者
 以為伴侶若諸國王大臣長者優婆塞等為護法故
 雖持刀杖我說是等名為持戒雖持刀杖不應斷命
 若能如是即得名為第一持戒又云我於經中亦說
 有犯四波羅夷乃至微細突吉羅等應當苦治眾生
 若不護持禁戒云何當得見於佛性一切眾生雖有

佛性要因持戒然後乃見因見佛性得成阿耨菩提
 又偈云

比丘若修集 戒定及智慧 當知則不久

親近大涅槃

又月燈偈云

雖廣讀眾經 時多聞毀禁 多聞不能救

破戒地獄苦

又十輪經佛說偈云

有真善刹利 供養於正法 三乘得熾盛
 當獲功德海 具足七寶等 徧滿閻浮提

持用施諸佛 其福猶有限 乃至四天下

造僧房供養 彼雖得大福 不如護正法

假使為諸佛 滿中造塔廟 彼雖得大福

不如護正法 譬如五日出 能竭於大海

若護我法者 則竭煩惱結 譬如風災起

悉摧一切山 若護正法者 亦滅諸煩惱

譬如水災起 漂蕩壞大地 若護正法者

亦消諸煩惱

思慎部

夫欲成大醫弘其三藏先須當機自療已患然後治

他法得久住不得為名利故空談名教不修一行遂
同狂醉故大莊嚴論云有二種醉一者家色財等成
就時醉二者他稱讚時醉此之二醉前一多是在家
人等富貴時醉開放逸門造地獄因後一多是出家
人等貪學名利輕賤自身希望他讚便生憍慢昏於
志趣失於聖意盲不見道流浪三塗故涅槃經云佛
告迦葉我般涅槃七百歲後是魔波旬漸當沮壞我
之正法譬如獵師身服法衣魔王波旬亦復如是作
比丘像比丘尼像優婆塞優婆夷像亦化作須陁洹
身乃至化作阿羅漢身及佛色身魔王以此有漏之

形作無漏形壞我正法又經云若有比丘以利養故爲他說法是人所有徒衆眷屬亦効是師貪求利養是人如是便自壞衆又云若有比丘雖持禁戒爲利養故與破戒者坐起行來其相親附同其事業是名破戒亦名襍僧又云復有常沒非一闍提何者是也如人爲有修施戒善是名常沒故經云善男子有四善事獲得惡果何等爲四一者爲勝他故讀誦經典二者爲利養故受持淨戒三者爲他眷屬故而行布施四者爲非想非非想處繫念思惟是四善事得惡果報又云是一闍提滅諸善根非其器故假使是人

百千萬歲聽受如是大涅槃經終不能發菩提之心所以者何無善心故又經云善男子我涅槃後無量百千歲四道聖人悉復涅槃正法滅後於像法中當有比丘像似持律少讀誦經貪嗜飲食長養其身身所衣服麤陋醜惡形容顛頽無有威德放畜牛羊擔負薪艸頭鬢髮爪悉皆長利雖服袈裟猶如獵師細步徐行如猫伺鼠常唱是言我得羅漢多諸病苦眠臥糞穢外現賢善內懷貪嫉如受啞法婆羅門等實非沙門現沙門像邪見熾盛誹謗正法如是等人滅壞如來所制戒律正行威儀說解脫果雜不淨法及

壞甚深祕密之教各自隨意反說經律而作是言如
來皆聽我等食肉飲酒自生此論言是佛說互共諍
訟各自稱是沙門釋子善男子爾時復有諸沙門等
貯聚生穀受取魚肉手自作食執持油瓶寶蓋革屣
親近國王大臣長者占相星宿勤修醫道畜養奴婢
金銀襍寶與諸技藝畫師泥作造書教學種植根栽
蠱道呪幻和合諸藥作唱妓樂香華治身擣蒲團碁
諸工巧等若有比丘能離如是諸惡事者當說是人
真我弟子若反習是事親近國王王子大臣及諸女
人高聲大笑或復默然於諸法中多生疑惑多語妄

說長短好醜或善不善好著妙衣如是種種不淨之
物於施主前躬自讚歎出入遊行不淨之處所謂沽
酒姪妖博奕如是之人我今不聽在比丘中應當休
道還俗役使譬如稗糶悉滅無餘當知是等經律所
制悉是如來之所說也若有隨順魔所說者是魔眷
屬若有隨順佛所說者卽是菩薩乃至經云破戒比
丘當於百千億萬劫數割截身肉以償施主若生畜
生身常負重所以者何如析一髮爲千億分破戒比
丘尚不能消一分供養況能消他衣服飲食臥具醫
藥又云樂視婦女不附男子乃至憎持戒者親附破

撰述
戒常讚布施不讚持戒忍辱精進禪定智慧不讚寂滅遠離獨處常好譏論持戒者過亦不稱讚行頭陀者或指其事惡口橫加又經云善男子如來正法將欲滅盡爾時多有惡行比丘不知如來微密之藏懶惰懈怠不能讀誦宣揚分別如來正法譬如癡賊棄捨真寶擔負艸麩不解如來微密藏故於是經中懈怠不勤哀哉大險當來之世甚可怖畏苦哉衆生不勤聽受是大乘典大涅槃經唯諸菩薩摩訶薩等能於是經取真實義不著文字隨順不逆爲衆生說復次善男子如牧牛女人爲欲賣乳貪利多故加二分

水轉賣與餘牧牛女人彼女人得已復加二分轉賣與近城女人得已復加二分復轉賣與城中女人彼女人得已復加二分詣市賣之時有一人爲子納婦當須好乳以贍賓客至市欲買是賣乳者多索價數是人答言汝乳多水不直爾許正直爾許我今贍待賓客是故當取取已還家煮用作糜都無乳味雖復無味於苦味中十倍爲勝何以故乳之爲味諸味中最善男子我涅槃後正法未滅餘八十年爾時是經於閻浮提當廣流布是時多有諸惡比丘抄掠是經分作多分能滅正法色香美味是諸惡人雖復讀誦如

是經典滅除如來深密要義安至世間莊嚴文飾無
 義之語抄前著後抄後著前前後著中中著前後當
 知如是諸惡比丘是魔伴侶受畜一切不淨之物而
 言如來悉聽我畜如牧牛女多加水乳諸惡比丘亦
 復如是唯以世語錯定是經今多衆生不得正說正
 寫正取尊重讚歎供養恭敬是惡比丘爲利養故不
 能廣宣流布是經所可分流少不足言如彼牧牛貧
 窮女人展轉薄淡無有氣味雖無氣味猶勝餘經足
 一千倍如彼乳味於諸苦味爲千倍勝何以故是大
 乘典大涅槃經於聲聞經最爲上首喻如牛乳味中

最勝以是義故名大涅槃

法苑珠林卷第三十九

校譌

第六紙

五行始宋南藏作垢

第十三紙

十三行今疑當作令

音釋

媵

而沼切擾亂也

罅

呼嫁切孔也

懿

乙蘆切美也

竚

除呂切立也

趾

諸市切

也

鏗

口莖切鏗鏘也

姑

乙蘆切

磔

陟革切

跨

苦化切過也

力感

曙

常恐切

捕

薄胡切

腕

烏貫切

締

丁計切



云九切

禾

麩

羊卽切

蘆葦山丘臨登施贊切此法苑珠林第三十九卷吳江比丘明覺對吳州趙之昂書上元周天祥刻萬曆辛卯冬清涼山妙德庵識



撰述

海晏瑛書卷三十一

十六

